

demontiran stari ski-lift

Mada je smučarska sezona 1971/72. bila vrlo bogata aktivnostima Sarajevskog smučarskog kluba, nažalost nismo uspjeli da pronađemo sve rezultate značajnijih takmičenja te zime. Pronašli smo dio rezultata Otvorenog prvenstva SSK u slalomu, koje je na Jahorini održano 30. januara 1972.

U konkurenciji seniora na ovom takmičenju pobijedio je Gramzov (Jahorina), drugi je bio Alihodžić (SSK), a treći Bobušić (SSK). Među starijim pionirima prvi je bio Zoričić (Jahorina), drugi Bracović (Jahorina), a treći Oruč (SSK). U konkurenciji mladih juniora najbrži je bio Tomek (Jahorina), drugi je Sejman (SSK), a treći Dmitrašinović (SSK).

Iz nepotpunih rezultata 26. prvenstva Bosne i Hercegovine u alpskim disciplinama održanog na Jahorini 4. i 5. marta 1972. vidi se da je Marjan Kalman osvojio titulu republičkog prvaka u slalomu za mlađe juniore.

U toku ljeta 1972. godine čini se značajan zahvat na planu kompletiranja objekata Sarajevskog smučarskog kluba na Jahorini. Dotadašnji ski-lift, koji je za dvanaest sezona eksploatacije imalo značajnu ulogu na planu konačne afirmacije Jahorine kao izvanrednog smučarskog centra, demontiran je i počela je izgradnja novog, mnogo savremenijeg ski-lifta Sarajevskog smučarskog kluba.